

Bunita Concierto di Pasco “Nochi di Splendor”



Diabierna 30 di November a tuma lugar un bunita concierto di Pasco “Nochi di Splendor” na Misa Birgen di Fatima na Dakota cu Melange, Corro Tutti Frutti (bao direccion di sra. Maybelline Arends-Croes) y nan amigonan musico; Johnny Scharbaay, Reno Steba, Felix “Chucho” Hoek, Lidrick Solognier, Hesther Mathijse y Humphrey Solognier.

Un bunita concierto cu a inicia e temporada di Advent. Prome cu e concierto sr. Edgar Kelkboom riba Harpa y sr. Edwin Kock riba guitarra a entretene esnan yegando. E concierto a inicia cu tres angelito, treciendo tres bela dilanti, representando e splendor, sigui pa dos ‘drummer boys’ tocando riba nan drum y sr. Richard Dabian, cantando e cantica “Peace on earth” cu e contra-melodia di “The little drummer boy” interpreta pa Melange.

E concierto a continua cu

diferente bunita cantica di Pasco na diferente idioma, estilo y genero, y interpreta den un forma y estilo hopi varia. E areglonan musical tabata den man di Johnny Scharbaay, Ivan Quandus y Reno Steba. Melange y e musiconan a dedica como sorpresa un cancion specialmente na pastoor Daniel Szpila. Un cancion popular di Pasco di su pais natal Polonia. E cancion ta titula: “W’ Zlobie Lezy”, cu ta significa “Drumi den pesebre”. Charles Croes di Melange a interpreta e prome couplet na Polaco, sigui pa pa Melange cu dos couplet na Papiamento. E comision organisador tambe tabata tin un sorpresa pa Pastoor Daniel y esaki nan a entrega net despues di e cancion Polaco.

E concierto aki tabata uno special ya cu tabata e prome concierto di Pasco presenta pa Melange den nan 24 aña di existencia. Tambe a recorda e 50 aña di sra. Maybeline Arends-Croes den musica cu un ‘standing ovation’.



E concierto a finaliza cu e ñapa “Bendiciona”, un composicion di Hildward Croes (d.f.m).

Tur presente a disfruta di un tremendo concierto cu cantante- y musiconan local, di taya internacional. Un presentacion profesional di parti di tur e cantante, musico, sin laga afor e areglistanan y e ingeniero musical sr. Ivan Quandus.

Pastoor Daniel y e comision

organizador kier a gradici sra. Maybeline Arends-Croes, Melange, Corro hubenil Tutti Frutti, tur e musico, areglistanan y tambe e ingeniero musical pa nan contribucion y presentacion gratuito haci cu hopi amor pa e concierto aki. Nos gratitud ta bay tambe pa e sponsornan “Interprint”, “Kok Optica” y “JDB Production”. Sin boso colaboracion lo no tabata posibel pa organiza e bunita concierto aki pa un contribucion chikito pa entrada. Un danki di

curason tambe na cada un cu a presencia e concierto aki. Ta nos mas sincero deseo pa boso pasa un Feliz Pasco yena di bendicion y cu e Splendor di e Niño Hesus por ilumina y briya den boso curazon.

Pa mas potret y video por bishita e Facebook page Misa Birgen di Fatima.

Comision organisador conhuntamente cu Rev. Pastoor Daniel W. Szpila CSMA